

四庫全書

集部

欽定四庫全書

集部

宛陵羣英集卷

四至六

詳校官通政使

臣

夢吉

助教臣常循覆勘

謄錄監生

臣沈

霽

謄錄貢生

臣張大同

謄錄舉人

臣范翔集

欽定四庫全書

宛陵羣英集卷四

元汪澤民張師愚同編

古體

七言

元

吳錫

有之老師下過留宿

龜峯之西結茅屋南岡先生夜投宿開門出迎喜欲舞
童子烹雞酒新漉別來三月意傾倒自言鬢冠相遇好

披圖見畫復見詩筆法遠過東岩老燈前細酌尊易空
僻居甚媿無鮮醲連牀醉卧不知曉覺來山寺鳴霜鐘
再用有之老師韻以謝

黃昏炊煙起鄰屋獨樹槎枒鳥爭宿新醅香動喜客來
螳泛蛆浮不須漉獻酬交處玉山倒燈火頻開爲詩好
勸君適興須盡歡昨日朱顏今日老書囊無底非談空
令人心醉如醉醲他年佳話起今夕應笑寸筵撞巨鐘

汪士明

崇士明字公亮士深之弟

題四御史詩卷

上元甲子龍飛春一時羣賢輔聖人四聰甚邇百度舉
誕降絲綸旌直臣直臣維何四御史鐵冠白筆侍紫宸
面如秋霜膽如石曾犯先朝批逆鱗奏章上徹雷霆震
此身視死猶埃塵寬饒竟到北闕下韓公遠謫辭西秦
忠言嘉謨倘悟主小臣微軀安足云鷙鳥既死不復擊
尺蠖暫屈當復伸忽逢天語爲昭雪一朝黥浹開青旻
死者當廟食子孫居要津生者賜環歸朝廷領縉紳彼

哉患得復患失重茵列鼎思全身回視四賢生死各盡
節何異鷄鶩爭食仰視鸞鳳凌紫氛

汪澤民

余幼有山中讀書之志因循弗暇一日同仲淵
昆弟行尋其所去西城七里敬亭之下莽蒼之
中岡巒迴抱未遂卜築

窮年矻矻厭城郭避地久憶山中樂山中之樂人得知
潛魚在沼林巢鶴西城七里敬亭陽岡巒星拱泉甘香

桑麻雞犬接人境幽尋似入武陵鄉卜居雖無買田具
因高面勢心相當平生畏友得二張髫年此志終不忘
要令六經心炯炯坐恐兩鬢成蒼蒼安豐董邵南鹿門
龐德公策我駕馬遠追高風噫我非斯人誰適從

八月十七日同遊敬亭得並字

湘中三年夢鄉井敬亭重遊心目醒雙流夾鏡一溪來
千仞齊雲兩峯並叢祠秋報同奠桂蘭若晚酣催煮茗
晴嵐暖翠約花時往覓丹梯登絕頂

施琪

案琪字永叔饒州
路初菴書院山長

遊徑山寺

迢迢雙徑躋層峯層峯高削青芙蓉嵐光掩映翠欲滴
夜半見日扶桑紅梵宮去天不盈尺樓閣崢嶸炫金碧
天香清徹旃檀林井泉寒鎖蛟龍宅烟霞欲曙撞華鐘
數千食指如雲從塵埃不到清淨界誰能面壁參真空
我來游觀春已老綠陰靜晝留芳草盤桓絕頂俯人間
超然便覺乾坤小開襟久坐松竹陰不知山外斜陽沉

西牕夜宿夢魂冷白雲流水皆知音山僧杯酒勤留客
白飯香芹薦芳席明朝興盡下山去回首青山兩相憶

侯賓于

紫賓于字廷美
官廣東憲使

送張漢英之金陵

平生不願爲傭書亦不願作章句儒酒酣詩成吐素霓
意氣凜凜吞千夫去年排雲叫閭闔出門一夜車四角
年年踰嶠席未溫一舸乘潮入催發大江之西日本東
廬陵人物常稱雄決科歲占十八九君當努力揚詞鋒

才高不用長歎息四海彌天豈無識壯年懷居亦何有
着眼帶礪開胸臆霜臺屹屹凌高寒豪士傾蓋宜交歡
我知屠龍不屠豨食馬正欲食馬肝吳姬壓酒吹香絮
謫仙神遊歌白紵敬亭惟有孤雲閒欲雨人間亦飛去

梅致和

題獨馬圖

西域之西生良馬丹青何年入圖畫良工不必問誰何
只此毫鋒便瀟灑肉駿汗血形如龍權竒骨與駑駘同

迥然獨立生長風自信不受金羈籠老驥猶能志千里
況此昂頭渴鳥勢聖朝捐金市駿骨宜向天閑驂六轡
夜宿三浯溪晨登摩崖山山下有鏡石以水沃
之可照見此地山水

征帆夜渡三浯溪隱隱巖石瀕穹堤舟人指點有石刻
廼知此是摩崖碑平生自負山水癖况復此地成幽期
停舟擁衣坐待旦霜氣慄烈侵人肌誰家咿喔靈雞啼
落月半壁沉天西攀蘿陟磴尋幽蹊拂霜細讀中興詩

字畫千古存勁氣筆力一代稱雄辭後來山谷賦長什
音韻激烈復何悲上凌絕頂倚霄漢下瞰萬頃浮晴漪
土花剝蝕崖壁古鏡石照映山川竒窪樽一盃涵積雪
老樹百尺懸樛枝鏗鉤林谷互響答疑有神物來護持
登臨興濃不忍去一聲長嘯江雲低

次韻舅氏登新安四面山

新安隴上松栢青峯巒拱揖四面屏雲來一派行宣郡
惟我舅氏明麟經少年飄飄鸞鳳志便欲奮翼凌滄溟

自從姓名登桂籍居官廉潔門常扃歸來坐席不暇暖
籃輿以次謁墓亭北登峽石西涉淫履霜披霧仍戴星
世間何物能報本只有孝行通神靈新安不遠數百里
足力雖倦何敢寧登高強飲菊花酒醉者自醉醒者醒
祖龍一朝賴公復應與天地終遐齡

良弓行

秦王英武擒黑闥玉帳鳴絃不虛發由來克敵在良弓
豈問烏號與繁弱材幹堅良膠漆固圓穹宣精列躔度

兩端骨弭亦光澤虬螭重淵挾中附東征西討良汝資
用之則安舍則危發硎金鏃霜入楛急絃送羽高橫飛
將軍貝曹五花馬十年講武長城下振旅歸來獻功績
旅矢彤弓自天錫

何儒行

丹霞篇寄冲妙觀道友

麻姑諸峯插修翠麻姑仙人鳴玉佩中有道人餌丹霞
採朮餐芝鍊元氣昔年我曾遊蒼崖碧樹烟雲秋烟雲

秋仙壇石老苔花幽尋觀怪石獅子踞石屋落日玄猿
愁玄猿愁白鶴舞相携乘風凌紫霧琳宮丹闕摩太清
下視人寰隔風雨丹秘金爐深劒藏石匣古揮手接高
真飄飄已遐舉道人笑掬山下泉竹房茶竈搖輕烟天
游之亭據幽勝玉堂寶翰何清妍却登齊雲閣持觴勸
明月明月滿山風滿林醉來清夢欲飛越我無負郭田
我無買山錢一邱一壑道人肯乞與便須寫我丹霞篇

胡師寅

題淵明愛菊圖

淵明思歸今已歸絃歌莫辦三徑資王弘畧有丈夫氣
可憐督郵真小兒彭城寄奴狂未死蔣陵風物寒如水
淒涼吟斷義熙前自傍晴牕書甲子秋風滿地搖黃花
脫巾漉酒夕陽斜揩摩醉眼看天地南山一點如栖鴉
人間畫史真狡獪逸氣英風長自在東籬晚節香更濃
不但淵明吾亦愛

題和靖愛梅圖

孤山孤處詩人廬西湖烟景光模糊生來不識軒冕貴
自愛野趣情怡愉種花不種閒桃李賸種寒梅照清泚
一簾春色動壺觴萬株玉雪搖書几暗香入夢吟魂清
浩歌出戶青峯橫車騎紛紛倦迎送應怪野鶴來飛鳴
吳兒不記先生語舊日祠堂漫無主梅花老盡紫苔空
只有湖船載歌舞

施霖

壽家君

山齋閉門春晝長黃庭一卷添爐香長孫誦聲差琅琅
幼孫啼聲更噉噉桐枝演迤日以昌兒曹豚犬森鴈行
大兒無聞壯且強抱材空疎志荒唐應門賴有二季良
家風儒儉循吾常彌年麤糲無膏粱斑衣庭前持一觴
容顏半老鬚眉蒼四時禮缺定省荒不辭衣食走四方
幸有形影相扶將不願腰金爛輝光願翁千年樂壽康
劉得之

送酈肖梅歸三茅山玉晨宮

三茅峯高不可躋茅君携雲作丹梯棄官應同棄弊屣
爛煮白石甘如飴世路紅塵有何好萬塚北邙蓬繞繞
茅君去漢二千年長向山中拾瑶草我無丹砂堪蛻肉
骨凡枉住麻姑琴高兩峯間便欲凌空借鶴歸茅山茅
君丹井知何處煩君指點雲間路脫我破鹿裘笑拂紫
烟去預借金陵道上泉淨洗黃塵兩芒屨

題松下老人圖

原註建平王宰
持此獻貢南漪

古松蒼髯枝屈鐵失笑相驚在巖穴老翁手持綠玉杖

獨立西風雙鬢雪
脩然野服山家容
平生我亦懷高風
彭澤歸來入圖畫
真有人間靖節翁
原註李伯時亦曾畫松下淵明圖

劉鑄

案鑄字禹鼎有慶之子舉至治辛酉進士歷安慶路推官知南豐州多惠政工詩

題高彥敬尚書畫山水圖

憶昔東走吳越間
杖藜所過皆名山
扁舟無端復西上
巫峽照眼青螺盤
五年塵埃卧環堵
慨想昔游良自許
偶然圖畫見崢嶸
似與故人成晤語
遠山屹翠近山重
白雲漲谷烟濛濛
平林雅淡見秋色
蒼崖古木蟠虬龍

溪迴林紛山路足林下何人結茅屋小橋野逕寂無人
依約山翁清睡熟鵝溪一幅君家珍尚書妙與元暉鄰
驪黃牝牡皆神駿誰謂水墨殊丹青平生愛山仍愛畫
畫裏看山天所借此身此畫兩俱亡孰與莊周同蝶化

汪琛

道中即事

龐公不肯入城郭幼輿只好著巖壑竹輦多事呼出山
紅葉蒼煙滿林薄天長雲影寫鴻鴈水落沙汀行郭索

故山永黍秋離離社甕欲香雞可縛

吳復興

送賈憲使赴中書郎中

仙官夙製芙蓉裳爲乘白鹿來江鄉江鄉水淺不可駐
却眺薇垣歸帝傍薇垣庶政如蝟積破竹持衡需左掖
上報英主開太和下副蒼生奠蘇息臯夔接武登清朝
羣公鼎鼎公能調就中吐握在所急詎肯詢采遺窮荒
江水東來豈云淺中有鯨魚逢蝦蟇願公咳唾轉陽春

老驥尚堪千里遠

題四御史詩

煌煌明光宮螭頭惟御史諫諍乃其職安用論生死二人同心可斷金何況四人同一心封章政有回天力豈料白日愁雲陰雷霆震擊無不裂豈料分爲生死別極知臣罪固當誅豈料恩波爲昭雪吁嗟往事無復云但逢芹曝思獻君休言折翼不再舉到底薰桂彌芳辛死者已爲逢與比不作曹蜍泉下鬼生者常笑仗下立誰

能孤負南牀食

高德壽

相逢行

與君相逢江之干
朱亭翠柳扶金鞍
風塵今日是何日
對面千里生悲歡
江聲瀟瀟江水綠
江上晴山削青玉
珠絡銀壺傾美酒
爲君緩緩歌一曲
歌一曲君且聽人
生何止如浮萍
萍飄東西有定所
人生不得須臾停
勸君飲爲君歌
當歌不飲君奈何
百年憂患常居多
君看

長江水日夜相催亦如此前波未收後波起世路無如
醉鄉好富貴令人頭白早

高德游

長歌行送王仲儀學正歸新安

原註時仲儀下第

酌君以萬斛玻瓈船君言不如名山大川窮鏤鑄贈君
以九節珊瑚鞭君言不如清風明月不用錢新安山水
天下壯形勢突兀隔雲烟上有摩空之層巔下有瀑布
之飛泉儲精毓秀自太古真元會合生大賢六經啟秘

四書出孔道日月行中天聞風百世尚興起況居桑梓
親磨研皇元太平四十年車書混一同中邊興賢有詔
表朱學文體一變無頗偏往年鶴書上天府二十八宿
如珠連我時材疎偶見黜坐看公等如昇仙禮闈擢秀
惜不與念子健筆空如椽天將有意降大任故使窮困
志益堅大鵬南翔息六月長鯨東去吸百川新生桂枝
儘堪折舊傳楊葉亦可穿要須明經拾青紫且共苦學
攻丹鉛天門射策誰第一大明殿上聽臚傳

趙由埜

詠朱買臣

擔樵結食行歌書不治產業貧哉儒妻羞求去翁笑謂
五十富貴當須吾妻怒謂翁餓死耳翻然見棄翁從渠
視彼王章真有愧乃知世間賢婦絕少紛紛愚上書長
安嚴子薦帝悅拜爲中大夫一朝富貴妻愧死高車駟
馬還官吳有恩皆報快志願故人召見良歡娛受詔將
兵復奮武擊破東越功尤殊九卿列位顯已足於斯時

退何榮如孳孳貪進且不已直待華髮身遭誅翁子預
知富貴固亦異胡不預卜全其軀當時貧賤思富貴富
貴不履危機絕世無

汪真

贈羽士陳靜山彈琴

琅然太古音出自羽人手如寫三峽濤沅我塵數斗神
仙中人不易逢聽君古調含僊風瓊瑤雜佩騎飛龍翩
然夜下蓬萊宮綠雲搖波江渺渺楚天平遠蒼梧小神

僊神僊歸去來一聲唳鶴青山曉

張商巖

挽江梅山

天地萬物難齊名梅花獨與山俱清
寒梅不彫傲霜雪
青山不老亘古今
偉哉君澤逸世士
倦止梅山築新址
平生心事惟愛梅
不數漫山俗桃李
吁嗟行年適在辰
角聲吹斷羅浮春
梅花香銷山亦傾
月明何處招詩魂
梅奕芳

送王月溪提點南歸

清溪月清溪月不受纖塵迴奇絕天宇泰定長虛明豈
問陰晴與圓缺清光一輪同古今北照燕冀南吳越前
年馳騎入京城金臺露坐詩思清今日扁舟還浙右西
湖延賞傳金觥東來孤鶴橫江起明月在天天映水南
樓一夜倍思君舉頭見月人千里對月痛飲須高歌百
年離合何其多

附七言古詩

按永樂大典內凡係失
名失題無考者附後

四禽言代江湖遠客遣懷

不如歸去不如歸去錦城還憶來時路他鄉寒食故鄉
心去住兩難春又暮

行不得也哥哥行不得也哥哥荆湘衡岳春雨多驅車
上阪復下阪奈此黃泥沒膝何

脫却破袴脫却破袴燈前刀尺閨中婦十年爲客獎貂
裘短布單衣雙鬢露

提壺盧提壺盧花前有酒君當沽二十辭家歎薄命丹

行陸走交荆吳人生得飲且自飲莫待霜雪盈頭顱

釋悶

燕丹未歸馬未角卞子抱玉無兩脚孤城食盡兵未却
度笮中懷挂一索我輩於此酒宜酌百歲千秋奈何樂

贈刻章者

我家秃筆堆平牆雕蟲小伎長荒唐君懷寸鐵妙勝筆
鳳綰鸞翔龍起蟄偃波垂露狀萬千薤葉橫披科斗拳
世間刻楮非天全鼻端斲聖人孰傳內府石渠時夢見

圖書漆竹光摩天陳倉石鼓霧雨濺嶧山棗木肥失妍
唐鐘漢鼎知幾年尤物竟與乾坤遷集古無人寶晉遠
滄江望斷貫月船金根伏臘謬分別腰下政用疊疊懸
君不聞兩石弓一丁字是非付與東流水眼中之人今
老矣

新橋詩

宛水南來瀉寒碧馳繞城局襟抱隔陽侯罌怒舟或傾
六月洪流幾哀溺使君爲政知所務興作飛梁水晶域

鑿山累址砥柱牢輓木梯空蜃樓立朱甍雲氣時吹噓
藻井連漪相蕩射西城東市連賈區越柁楚帆來遠客
常時褰裳泥拍膝忽看揮袂平如席雨止風收練如織
長虹截斷秋光白結構去天知幾尺凭欄下視星斗濕
不須更駕海上槎飄然欲問支機石

山鹿忽至庭下捕之不獲

前山花樹濃如煙後山風清鳴乳泉荆扉半扃人語靜
野鹿何事來庭邊人言此物仙吏曹世間處處堪嬉遊

殺紋豎攢蒼玉角雪花亂簇黃金毛縱神逸態何敏速
歎忽驚飛如過鏃脫身已入碧雲鄉野虞畋犬空馳逐
嗚呼古來鳳鳥何嘗棲藤蘿麒麟騶虞無網羅山岑葉
短幽蘭多鹿兮鹿兮奈若何

贈黎東山

黎東山山澤癯挂冠卜築郎官湖十年重見霜滿鬚手
持鉅編架驪珠謂言匡廬兩遊娛右挾金輪左香爐雲
間五老相招呼牽蘿躡石升天衢銀河翻落寒巖陬驂

鸞跨鶴疑有無遐瞰八表在斯須黎東山大丈夫風期
固與常人殊畏途聲利爭馳驅汨沒坐遣朱顏枯誰似
東山超然高世道自腴我知物外真良圖未脫塵網不
得俱山靈有約焉可誣酌泉一酌陶與朱巢雲倘許山
之隅

省掾楊善甫孝養其母母冬月欲葷求之不得
忽得之楮木人以爲孝感所致

紫薇花省紅蓮賓有祿足養白髮親金盤豈無鯉魚尾

綺食亦有猩猩唇母心欲嘗黃耳輩兒啼往訴霜楮身
枯枿頓發空山春萬釘鱗鱗色勝銀升堂一笑奉珍味
白鵝截掌鰲解裙楊君事親心最純孝行有感天應聞
孟家冬筯堪擬倫作詩紀實追前芬

友人張仲淵汪叔志皆有山居之志因作此詩
張家仲叔吾所畏仲也多才秀而美攻書惟愛王右軍
作詩苦似陳無已叔分年少尤奇絕雄辯高談霏玉屑
句中有眼字有骨下筆飄然思超越汪生疎俊氣吐虹

清新敏捷語更工揮毫對客立可就人言一字千金同
文章筆墨未足論三千正在希軻雄恐貧苦節不畏謗
要持古道變頽風平生取友得三益冥棲竟欲歸山中
何當採芝與爾尋黃綺一邱一壑長相從

伯兄容菴公既復諸先壟饒歛間至元再元之
之四年上冢立石修祠致祭遂登山采菊賦詩
紀勝歸以示予謹次嚴韻以述先德並言吾兄
培植松楸之偉績焉

越國忠武懸丹青巍巍著望齊花屏少卿內翰皆間出
雄文大冊天緯經科名十世聯簪纓魚龍萬里開滄溟
綿綿忠孝繩祖武一一俊人排天局伯氏感慨追前人
秋風灑淚沾恩亭松楸培植四十載寸心炯炯昭日星
由來一念關蒼冥况復純孝通神靈豐碑紀載土田復
烝嘗偏舉魂其寧爰登四面展遐眺枯崖朽木皆爲醒
華觴引滿澆醜磊毫端秀句垂千齡

舅氏既復先塋且有事於松楸既而九日登四

面山有詩以記歲月謹次韻

秋晴四面峯巒青烟霞作圖翠作屏龍溪後人我舅氏
新安此地凡幾經邱壑胸中納雲夢波濤筆底驅滄溟
宦游侯藩志已顯歸來故里門常扃宅前鼇頭枕宛水
樓外山色迎昭亭科第蟬聯紹光祿文華煒燁瞻婺星
古今百行孝爲本天地萬物人爲靈十世松楸一朝復
九原衣冠千古寧重陽採菊共登眺羣從簪萸同醉醒
遙知持觴爲公祝錫類錫膺綿修齡

欽定四庫全書

宛陵羣英集卷五

元汪澤民張師愚同編

今體五言律

宋

李含章

按含章字時用登太平興國庚辰進士授屯田都官員外郎累遷太常少卿封潘原

縣男所著有倦都集五卷

石盆寺

巨石何年琢為盆勢莫裁圓疑通澤國深可並天台法

水長時滿青蓮向日開無人知此喻寂寞首空迴

陳天麟

青山道中

田舍雞升屋山家犬應門馬行黃葉路水遶夕陽村老
覺貧為累吾知道可尊此行聊復爾萬事信乾坤

舟中

湖濶帆風飽山長眼力疲晚涼行進酒秋色最宜詩別
意果作惡虛名難療飢此生無住着投老欲何之

用梁漕韻

千里岷峨外三年漢漾西
急流衝水馬腐壤伏櫜鷄
伐樹驚遭宋聞韶喜在齊
何時燈火夜重與折紅泥

上瀘帥梁公

子輔

舊已元樞幕今猶大將牙
恩威伸六詔封域總三巴
早晚看鳴佩軒翔入判花
不妨乘駟馬上塚一還家

冊府推前輩文場慣主盟
冀閑收汗血崑圃出連城
料想金甌覆遙知水鑑明
從今青與紫四海盡門生

六轡澄清日三軍指顧中
關山都識面草木尚傾風
飲馬伊吾北回鑾澗水東
廟謨應富有傾倒莫匆匆

旌德道中

山邑無郵傳農夫半甲兵
石橋橫斷岸草徑入荒城
聞道甘泉駕將臨細柳營
風塵何日靖留眼看昇平

林宗放

餞使君

始聽歌來暮還聞說去思
但知憂國計那肯問家為
跨

竹兒童集攜書父子隨謝城攀戀處爭作畫圖披

吳潛

按潛字毅夫嘉定丁丑進士及第歷官中外淳祐十一年進參知政事拜右丞相兼樞密使後責化州團練使循州安置卒宋史有傳

送林明府

擬續宣城志難忘令尹賢庭空無獄訟齋靜有詩篇心似秋雲遠政如霜月懸活人最多處饑歲作豐年

送何錫汝

風雨一樽酒此懷誰得知三春花老後千里客歸時浩

浩人間事悠悠身外思君如能擺脫林下早相期

掃墓書所見

松楸生夜夢風露作晨征山近却無色葉枯偏有聲
架禾知歲熟種麥得天晴到底農桑好營營媿此生

李孝先

按孝先字介叔含章子以任為太廟齋郎
歷虞部員外郎改朝散郎賜三品服勲上
輕車都尉卒詩篆琴棋並
登妙品著有柯山集十卷

登江瀆水心亭

晚興清無比幽亭積水中菱荷千柄雨松竹四軒風
鬪

鴨飛翎健潛魚靜思冲飛潛乃常事何足較窮通

李漁

田里

百穀盈成後三秋假樂時雞豚開社甕簫鼓賽神祠
野茹青盈莒香炊雪滿匙欲知田里趣細誦老翁詩

次韻周與能

墜緒今如綫遺書尚滿床功名兩蝸角世路幾羊腸
癖有登山屐貧無在笥裳故人應見念莫遣字稀行

莎雞

悲思亦何苦繁聲咽未休空庭殘月曙衰草故園秋物
化終歸盡年華迅若流要當期子夜相與和商謳

曉出

凌晨躬歲事未曉出城關路暗雞三唱天青月一彎華
香衣笥外嵐翠竹興間欲盡清游興官程索遽還

食兔詩

弱質司明視虛名直望舒軼羣辭上蔡能事到中書狡

計空多窟珍盤竟付厨獨將毫末效曾紀汗青餘

謝張世顯詩卷

珍重張公子交情不我遺肯迂林下步來贄袖中詩江
樹煙中色叢梅雪外枝吟哦清絕句一一可同時

鍾山

白鳥江天濶青山佛閣重影孤寒日塔聲殷暮煙鍾異
世文中選當時鏡裏容猶傳遺蛻骨只在此高峯

原註
寶公

塔在山頂世傳梁
昭明乃寶公後身

發于湖

斷岸收潢潦蒼烟出翠微衆帆爭鵲港孤塔認臬磯萬
事皆前定重來悟昨非此身縻薄爵何處避危機

李蟠

送德基

單闕多餘慶清時得偉人德隆荀氏操學慕孟軻醇久
媿溝中斷常親席上珍征帆忽西去悵望宛溪濱

劉有慶

送楊長卿任贛州知事

望郡推章貢斯遊趣不希
風清王儉幕春滿老萊衣
鰕沼迎秋月螺亭覽夕暉
政成如有句肯寄北鴻飛

潘獻可

春晚三客同出郊歸途甚醉

尋友逢三益追歡且一時
買魚呼野艇沽酒認村旗
暫覺行歌樂何妨醉舞傲
牧兒休駭愕橫笛且須吹

四月十八日之桐川

白鳥蒼烟外黃鸝綠樹間雨晴初有路雲薄不藏山村
酒成孤酌征鞍厭獨攀日長人自倦更覺馬蹄慳

固城懷歸

稅駕蠶將老旋車燕欲歸人情秋思薄酒力晚風微青
鬢愁邊改丹心老去違吾廬元不遠望斷白雲飛

元

熊不易

即事

山亦無情色蓮非解語花不傳金谷酒却送玉川茶雅
潔焚香地丁寧種樹家白雲生翠麓去去故園賒

倪應淵

金山寺

金錫飛來日靈鼇負地形濤翻四面白寺裏一山青海
月窺簷箔天風語塔鈴倦懷思煮茗誰與汲中泠

王儒珍

按儒珍儒
珪之弟

書淮陰傳後

楚漢爭雄日乾坤殺氣昏築壇需上將決策拜王孫百
戰通侯爵千金漂母恩如何天下定却憶蒯生言

王圭

和孫子善賦落梅

花盡春纔半東風枉斷腸空尊愁落月長笛怨清商解
佩懷人遠返魂和夢香多生餘習氣為爾借流芳

和戴帥初陪廡憲副遊三天洞韻

閒居耽勝事遠意得扁舟白社多豪逸黃花共拍浮江

山酬句律時序入觥籌不似城中客紅塵漲馬頭
勝迹三天洞清遊五字詩懸泉垂馬乳暗谷隱龍池坐
久禽聲集吟殘樹影移賢侯興不淺應有後來期

黃葉荒溪滿青蓮紺宇開闌干盤石樹方丈出氛埃洞
古游人識巖高倦翼回祇應山下叟常脫繡衣來

莫道禪扉小幽人舊此巢結跏餘石蹬飛錫想林梢自
喜遺塵鞅非因問貢色詩成留歲月醉墨灑泉坳

題趙景陽所撰朱節婦傳

寡鵠中宵泣寒棲祇舊枝細看彤管記何愧柏舟詩教
子斷機織養姑生鬢絲誰能旌孝義為奏九重知

王璋

憲副廉鄉林以賓客泛舟遊三天洞帥初有詩
紀行次韻

上國皇華使清江畫鷁舟山光屏上見樹影鏡中浮淪
茗先誇水行盃任點籌紅塵滿城市小憩莫回頭

古洞堂堂敞危巖戶牖開陰靈蔽雨電清絕離塵埃破

靜幽禽響臨深駭鹿回百年山下路未省使車來
不作招提境應宜隱者巢金沙明洞壁珍果落松梢寺
戶泉供釀禪僧石打邑出山還不遠艇子插林坳

送潘季脩之新安學正

文公遺舄地子去作儒官六月火雲熱千山行路難定
知軒鶴舉何惜案螢乾故國多圖籍歸時待借耆

題曹娥廟

稟來純孝質何必讀詩書斷石苔侵字荒祠客下車林

香埋玉骨江淨出文魚多少儒冠者低頭媿此姝

甄府判致仕

賢哉此大夫未老已懸車雅志甘丘壑高風照里閭
兒能魯殿賦家有鄴侯書愛惜軒裳者稱量恐不如

雨止登土山龍湫

連峯千象緯恠物宅岩隈抱石多奇樹非時有怒雷
郡官迎水去野老賽神來似識幽尋意山雲為我開

九日雨中懷牟文甫

問訊籬邊菊今朝數藥黃山林成皓首風雨又重陽老去才都盡秋來興故長相思礙行潦不得共傳觴

約文甫不至再用韻

俗裏眼能白懷中印未黃雙鳬離葉縣獨鶴下陵陽晚歲故人少閒門秋草長知君非遠我自為困壺觴

謝貢仲章惠羅帶古鏡

紫織文何麗青銅瑩欲流何殊鞞鑑重愧乏紵衣酬寬覺腰圍減明嫌鬢影秋雙珍無一稱但感意綢繆

次韻郭祥卿雪霽見懷

雪嶺留初日高齋照眼明禽聲交曉樹馬跡上春城有
客懷幽賞題詩問友生青鞵得來徃更待數朝晴

汪鑫

曉發雪川

鐘絕棹歌發霜寒過雪川雲棲山頂寺月墮水中天宿
雁驚漁網啼鳥近客船舟人自相語滄海半成田

舟行望雪川

水郭蒹葭裏荒祠集暮鴉舟行隨岸曲帆轉受風斜歲
晚愁為客天晴喜近家野梅如有意忽見水邊花

汪銖

散步偶成

飯餘同散步攜手過東村詩覓友人和方尋醫者論雪
消溪路滑水出石塘渾歸語山窓下爐頭火尚存

夜宿白雲寺

撥雲攀絕磴窈窕入禪扃瀑布飛來白煙巖濕處青齋

厨猿掌爨磬室虎聽經更有清心處幽花發素馨

重過昇州

昔歸衣冠地今為狐兔丘興亡原有數歌舞竟成愁落
日烏衣巷蒼煙白鷺洲徘徊不忍去知者為心憂

送何鍊師還山

舊業昭亭下歸來雪滿簪潛魚脫溪網老鶴戀雲林風
磴松花落烟畦藥蔓深不知從此去何日定相尋

送魯山長

鱸堂初徹講官路又三年夜醉丹陽酒朝登白下船蜀
天迷去雁楚客怨啼鵲懷德情難報臨分重愴然

雪夜寒光主人別業

林風雪夜清相對有閒僧坐久然松火眠遲話葛藤天
寒悲衲褐牕冷翳殘燈到此忘機慮欲歸猶未能

挽羅一舟

原註任武
進教諭

怡堂當日宴談笑憶驚筵坐失同庚友那逢在巳年文
興人已老武進士無緣賴有河東鳳斯文定永傳

挽章恬齋

講道陵陽日猶如太學時青燈照寒席白髮被深衣
明月雞山隱淒風麟野悲舊人惟宋玉清淚獨長揮

陳良弼

按良弼字公輔少辟憲史有聲為嘉興路教授調上元簿後以旌德尹致仕

遊三天洞

混沌知誰鑿虛明夜不闕雨晴松子落洞濕土花斑
洗金沙淨雲封白石閒空山千古在龍去幾時還

梅德明

和汪叔志晚望山門韻

山門藏絕境青壁上參天石漏牕中月巖通洞底泉幽
期恐搖蕩晚望每留連遠憶瞿硎老神交碧落邊

潘如瑗

用韻東董瀾溪

南國文章伯于今董仲舒青雲跨駮駟碧海掣鯨魚到
處誦君實逢人讀子虛如何相見晚潘鬢二毛初

胡寬

自述兼別陳華仲侯敬所

白髮返初服所交今漸稀
掃霞眠石冷汲井灌蔬肥
樹老花慳發天寒鶴戀歸
何人江海上海上早悟蹈危機

趙孟禧

長至

緹灰浮北律香雪點南枝
天又還周統人思見漢儀
眼前能獨樂心事竟誰知
賴有床頭易時時對窓義

見從兄資深

一別八年久兄西我戍東雨床頻入夢天柱忽摧空命
各逃兵後心俱類醉中不堪談往事加飯且頤躬

胡晉

題劉氏嘉秀亭

竹好能醫俗池清可鑑心要須娛晚節直此抱冲襟茶
竈沾晴露書床趁午陰山王雖貴顯不入五君吟

和玄妙道士汪樂全韻

按宣城縣志
作玄妙觀

矯矯餐霞子凝神志不分丹書研曉露仙服剪春雲山

水鳴琴悟松風煮茗聞時能吐佳句艷雪舞繽紛

汪珍

雜興

柔鐵不成劍散材難作輶侏儒笑方朔年少辱王孫自
分駒閒阜誰將鶴寵軒平生赤藤杖信步答乾坤

山居

我愛山居好經旬不出村芭蕉全學扇啄水誤敲門酒
病妨開卷天陰罷灌園當年杜陵老北崦與東屯

郊居

雨餘芳草遍氣韻入梅初客借分茶杓隣同灌韭渠山
苗尋杞狗野飯割梭魚信美真吾土何須更卜居

渡口

漠漠村墟迴冥冥煙火微廢臺猶近驛舊館半無扉水
濶魚蝦賤天寒鴻雁稀前途正風雨泥淖上征衣

過當塗

原註是日拜
李太白墓

不見當塗月空遊太白祠六朝多少事孤客再三悲圩

父收菰米舟人唱竹枝蒼蒼煙水外搔首立移時

西溪

黃葉三叉路清溪十里村蒼藤懸古木流水帶荒原歲
晚牛羊瘦天寒鳥雀喧居人戀風土耕鑿長兒孫

舟過三塔寺渡雙湖

亭亭望三塔渺渺渡雙湖天濶低歸鶻江平散浴鳬煙
寒傍城郭風急響菰蒲遙聽舟人說荒林廟子胥

曉發

夜宿吳鄉雨朝行越樹煙山川頻送客風雪故催年舟
穩者三老囊羞得一錢歸帆喜無恙伍廟大江前

失題二首

水色裙腰碧蓮香女頰紅峯巒雙竺外煙雨六橋中一
自風塵改都知夢幻同相悲最相識搔首問吳鴻
僦屋與山近山房即是家渴禽窺硯水幽蝶護盆花習
懶拋詩草安閒長道茅誰能共觀妙不必卧煙霞

何致中

寓潭清

東書遠塵市，僑寓畫圖間。
花落林逾靜，鳥啼春自閒。
無錢邀白墮，有分老青山。
不是嫌賓客，清風為掩關。

深秋

桂淙花三色，簾飛水一灣。
苦吟生白髮，歸夢繞青山。
雨久琴絲潤，風清扇影閒。
遠遊元未厭，丘壑可躋攀。

貢奎

同朱克齋蔣教授遊大聖寺

數畝林塘迥危城下百層客遊偏得地寺靜不逢僧隔
岼連商舶重門鎖佛燈愁來詩興短回首暮雲凝

搶竿嶺

薄宦辭家遠經秋未得歸直隨山北去却背雁南飛川
淨白雲起郊平紅樹微憶曾留宿處立馬認還非

陽墅道中

馬上千峰列溪行不盡源野船高似屋山縣小如村路
遶田間曲池漫雨後渾靜來應最樂綠樹擁柴門

郊行

雙溪溪上路重到五年遲
桑柘成陰處鶯花向老時
泊舟隨岸曲坐石看雲移
政愛沙鷗狎鶯飛底見疑
樹末炊煙綠人家住澗西
風輕鶯語滑泥重燕翎低
塵渴憐新釀郊吟憶舊題
小莊蠶最熟喜欲報山妻

別墅通幽徑肩輿駐午涼
石楠雲護影籬蔓雪浮香
地僻疑忘世民淳喜饋漿
微名何足戀投老更徜徉

張師愚

林亭

結宇依林木虛閒愜隱淪柴門時有客苔徑自無塵摘
菓山童慣營巢野鳥馴清風人可挹鄰曲漸還淳

送南陵宰

見說今為邑南陵政有餘春阡馴野雉夜網縱溪魚肯
和歸來句方催上考書清時宜柄用要路莫踟躇

送陳公輔之采石院長

鶯花迎曉色書畫載輕舸肯道儒冠誤翻嫌幕府勞蛾

眉上碧落牛渚送春濤地勝仍多暇吟詩弔錦袍

送李一中遷浙東憲使

之子浙東去行韜風正薰名駒真汗血蒼隼快凌雲緣
飾資經術彈治贊惠文清脩家法在應不愧前聞

題郭節婦手卷

淮海兵戈滿崩城哭杞梁諸孤遠從母萬死竟還鄉貞
烈光前古絲綸表未亡聞倉汲長孺端可慰高堂

送薛屏山司稅秩滿將集選曹

少保唐朝傑聞孫南土英征商嗟絆驥祖道正啼鶯折
筍供慈母看花到上京牛刀如可試莫惜惠宣城

送孔世廣

闕里文宗盛銓曹選擢優行堪振鴻羽豈待敝貂裘楚
澤薰葭晚吳鄉橘柚秋歸程逢勝槩舟楫得夷猶

送沈衡州

自息潢池盜誰移北海風地優千里選才屬萬夫雄樽
俎威名外江山坐嘯中祇今臺省上未可後諸公

欽定四庫全書

宛陵羣英集卷六

元汪澤民張師愚同編

今體

五言律

元

張師魯

題劉氏嘉秀園

我愛劉氏園緩步尋芳蹊晚桃弄碧色春桂生丹萸
茶鼎雨聲沸酒壺禽語提欣然一笑賞有句為君題

送胡壽卿之歙縣

吾憶新安路溪明山更奇
半開金菡萏不捲翠漣漪
耕織鄉無盜絃歌縣有師
此行真得意觸目是新詩

九日登西岡

節物何瀟洒登高引興賒
臨風整烏帽隨意插黃花
彤勝連三楚乾坤合一家
平生多感慨長嘯對飛霞

送胡彥德之于湖

之子方英妙携書亦壯遊
家聲仰安定詩律喜蘇州
野

腊經秋日江鮮入甕油慈闈調膳後永錫及吾儔

挽敬仲王徵君

南國成清隱高風與世殊霜筠半山宅烟樹輞川圖
杯酒哦新句衣冠肖故吾所嗟鴻鴈盡拭目在嬌雛

送吳子彥宰辰溪

丞相忠言在郎官世胄華地偏須卯酒心澹養辰砂荒
服無論遠皇風孰有涯鳴琴何所樂稼穡與桑麻

別墅偶成

報道新醪熟持杯紫翠邊樹鷄吳味勝穀犬蜀烹鮮習
靜來塵外游情到物先此時忘世慮岸幘付陶然

莫怪園池小聊舒遠世蹤人情驚寵辱我意樂踈慵瓜
蔓垂青鼠蓮房仰翠蜂偶來參萬里一笑孰予從

野服無塵染林陰浣晚涼山杯凝茗雪水葉藉菱黃香
脆堪清暑風流勝舉觴翛然真自得何必論行藏

南國秋風老吾人髮亦疎霜崖依繡樹石澗漾青魚膾
玉思垂釣堆紅可學書何當結幽伴來此託茨居

野老欣相見山盤獻所宜
賽田分社臘報祖粉秋資風
味猶存古農談亦少欺
居然有淳意榮辱未嘗知
原註吾鄉以所烹牛羊豕肉和之血中為盤餐他州所未見也往往見嘲笑於遠人無有解之者余閱玉篇有字為臘音與損同謂熟肉內血中和也然則其來尚矣粉資見周官

題耕綠亭

謝朓高齋外誰知此亦奇
一川藏菴畫衆岫列罍愚
野綠耕初起林紅種未遲
河陽新政績風俗尚堪為

凌希惠

挽孫子善教授

耆舊凋零盡臨文獨泣然春風何遜筆白髮鄭虔羶幾
蠟尋山屐空迴載酒船平生知己在銘筆看如椽

吳鎔

象山書院即事

我本閩中客因人得勝遊泉聲晴亦雨山氣夏先秋舊
友能青眼新知豈白頭開懷盡樽俎更為月岩留

汪士深

題劉氏嘉秀園

行過雙橋路尋春到小園
雨香林下屐花影席間尊
託興惟泉石流芳到子孫
非君能愛客風月更誰論

汪澤民

東郊

苐葉田田紫芹芽寸寸黃
川平散鵝鴨草短見牛羊
宇宙心猶壯丘園跡未忘
長年懶是癖何日醉為鄉

送李學甫宰臨湘

君去臨湘縣江帆幾日程應知小民困屬望長官清晴
晝萱花好春風棣萼榮亨衢方接武消息佇佳聲

懷三天昔遊

石洞禪師室招提劫火灰泉流龍尾曲山勢燕巢開結
構雄金地題名破綠苔春風吹夢遠紀勝愧無才

清明日喜晴

原註是
日間鵬

旅寓連雲麓無眠遲曉晴暮春逢甲子芳節屬清明宇
宙涵生意耕桑樂太平啼鵲何事切馬鬣故鄉情

送番陽楊明仲山長任閩中巡檢

章甫寧淹久嚴裝職警巡
賓鴻到彭蠡匹馬向甌閩吏
卒橐弓矢門庭接縉紳
會當陞館閣高步有通津

送海北憲使

海康隆憲府曹掾簡清忠
問俗通黎語憂民卜颶風
辟書催棹發行李任囊空
勿憚南程遠升臺計日功

游龍興寺和綦母潛著作韻

古寺依城市幽尋一扣扉
劫餘房相石世授祖師衣

原註

寺有唐碑房相國製文徐挹古八分書又有屈昉布二十五條大衣宋紹興然上人所受于祖師者蓋南渡以前物也
金像爐烟暗祇園樹影微囂塵暫時遠闌闌馬如飛

長堤渡

長堤臨津口狂風晚雨斜石苔粘綠髮河柳吐紅牙鳴櫓驚沙鳥迴舟激浪花樂飢寧飲水解渴漫思茶

挽梅叔章

壯歲上京都游楊得舊儒承家宛陵集積慶老萊圖

原註

梅有母在 宰邑曾馴雉休官擬鱸鱸新阡敬亭北愁絕白雲

孤

寄浙西張庶訪

今代皇華使張綱德業優弓刀閒上將旌節按諸侯強
禦成擒虎高才善解牛遙憐浙江水不向宛溪流

昔獻明經策因知侍御賢陳蕃能解榻文舉乃忘年花
柳春城外湖山玉節前觀風應有作莫惜野人傳

送陳公輔采石山長

磯伏金牛異峰攢翠黛雙同遊懷絕景相望只鄰邦春
紫宜供酒靈犀莫照江此行應最樂山水在書窓

汪用敬

案用敬字彥
恭澤民長子

過畢冲

夜宿琴溪鋪朝行柿木坊青峰照殘月紅樹染新霜漸
喜城闌近何愁道路長龐山重回首安得繼餘芳

施琪

和麻姑道士姚子純韻

野岸相逢處臨風共聽泉
長江無盡日喬木不知年
秘術窺丹錄閒情寄素絃
烟霞發天趣酬唱每流連

梅致和

次叔章兄閒居韻

倦作繁陽宰幡然解篆歸
行藏隨所寓迎送近來稀
荒徑存松菊南山有蕨薇
行年踰七十猶著老萊衣

小閣臨池構公來日捲簾
景多吟未遍山好看無厭
祇益耽書卷寧須問酒帘
朋來誰報似乾鵲在晴簷

綠陰滿地上門徑亦幽哉問字人頻至催租吏不來芸
編香滿架桑落碧浮杯雅愛敬亭好軒窗頻為開
結宇依黉舍開軒對玉山髮從明鏡老心與白雲閒頗
達窮通命能參善惡闢難兄同我趣風雨屋三間

贊蒙古御史

人物科場俊才華命世雄自從我黑豸誰不避青驄德
澤蘇民瘼勲名達帝聰觀風到江左春意藹芹宮

題問源亭

為甚清如許山中有活源暗通蒼石竇冷漱白雲根
瓢飲塵心靜川流道體存築亭當此匯終日看潺湲

施坦

孟冬過劉氏園

蠟屐乘閒日芳園適趣時亂聲秋樹葉寒色晚花枝
客裏無遺景年華輒入詩優哉聊復爾何用歎棲遲

和梅叔章閒居

彭澤歸來後門前柳五株心閒四時樂塵累一毫無香

結幽蘭佩詩裁明月珠襟懷任曠達寧肯類拘儒

何儒行

三月二日往硤石歸訪書堂寺

匹馬昭亭路東風日未斜要尋丞相迹來訪野僧家古
逕多芳草幽巖半落花甘泉一甌冷和醉漱烟霞

劉得之

琴高峰

怪石清溪上荒臺劫火餘風帘桑落酒春網藥渣魚笋

嫩和烟劇畚新帶雨鋤玉堂人不見花竹亦蕭疎

遊西湖

勝地流連久西湖得再遊
芰荷圍畫舫楊柳護紅樓
風月蘇堤夜烟雲葛嶺秋
買鮮沽美酒且莫計觥籌

貢師泰

案師泰字泰甫奎季子泰定四年擢第仕
紹興路推官歷戶部尚書遷平江路總管

所著有詩經補註友迂玩齋螾竅
閩南東軒諸集行世元史有傳

遊江陰君山

孤嶂臨滄海千山湧大江
遠帆歸市獨高塔到波雙鷗

鷺爭洲淑蛟龍怒石砭壯遊心未已飛雨洒樓窓

侯天祐

案天祐字伯純

湖上逢僧遊春

閒步西湖上烟波淡蕩辰山花迎客笑溪柳為誰顰燕
妓紅衫短胡僧白帽新料應嫌寂寞也恐負青春

錢震孫

案震孫字公茂

送張仲益北歸

家在浚之郊言歸豈憚勞蘇章貧有笈范叔冷無袍故

里多君子明時待俊髦臨分惜春暮風絮滿江皋

次韻程主敬存真道院納涼

知君山水樂任爾簿書牽官舍哦松暇仙家借榻眠詩
成彩筆健酒瀉碧筩圓鵬鷄難同調蹉跎祇自憐

送憲副暢公調浙東

萬里綸音至三秋玉節遷江山粵王國書畫米家船慣
飲雙溪水行登尺五天道山清絕地重見賜金蓮

施正大

案正大涇縣白塔里人至元間丞相巴延
下江南辟知本縣初縣治在水西苦漂蕩

正大徙於水
東迄今賴之

挽括齋教授

六館真英傑三朝舊典刑
叩閣曾抗疏避地復橫經
仕路驚頭白家山入眼青
平生清苦處身後有餘馨

王時中

案時中
字伯庸

送吳起季溫州學正

十載儒官冷新除又遠州
七山如北斗多士數東甌
紅樹城西晚黃柑海上秋
橫經有餘暇雁蕩足清游

胡元舉

案元舉字子仁蘭亭山長

送歐陽生歸省

甥館琴書樂胡然賦式微定應烏反哺況有鳳子飛江
雨催行棹秋風吹客衣行當榮祿養作吏未為非

王鼇叟

送翟錄事

籍甚霜臺客云胡滯錄曹常關羅雀戶焉用割雞刀事
劇心常易官卑名自高乘驄應不遠去思繞江臯

荀原道

城中晚歸即事

催歸啼更急相望白雲還
西日眩行色東風醒醉顏
僧歸黃蘗寺鳥盡敬亭山
後騎且莫迫月明溪一灣

次韻馮麗明表兄山居見招

多謝知心久長懷會面遲
移家竹深處課子雨涼時
種菊鋤荒徑騎驢過小堤
山中足詩興把酒許分題

李震午

自笑

旁郡方戈甲幽居獨草萊月隨雲影沒風挾鴈聲來自
笑生涯拙仍嫌歲序催有山堪着眼無客共銜杯

高德壽

山居春興

白屋窮經士青山習隱身吟餘花落砌睡起鳥啼春沽
酒為延客借書頻訪鄰誰能入城市揮扇障紅塵

趙由皦

近況

寂寞溪居好鋤畦自種蔬催租人至數問字客來疏飢
阻傾家釀吟妨課子書年華今若此生計復何如

師敏

自述

對花驚鶴髮種竹作菟裘每惜陶元亮空懷馬少游飲
河期偃鼠粘壁笑蝸牛獨有琴書味雖貧老不休

董天吉

送廉使傅公

天涯將蹈遍產處合黃扉心共燕雲遠身隨漢節歸江
寒鴈半渡霜落蟹初肥畫錦西風落時應念布衣

送萬戶府經歷龐世安

鹿門培隱德鳳穴產奇毛曳組全家貴談兵此客豪書
籤沾雨濕箭鏑入雲高歸到荊花下春缸醉玉醪

遊廣教寺

靈山祛俗慮萬境一漚空黃蘗十年寺緇衣數畝宮殘

鐘咽昏曉古樹飽霜風消得騎鯨客題詩殿屋東

偕庶端甫副使遊三天洞戴帥初作詩次韻

若領東山妓定知無好詩平生謝公屐到處習家池渡
口船頻繫沙頭榻屢移還應見漁父相與話心期

誰鑿通天穴雲窓次第開玉泉鳴有竇石室淨無埃地
老禪房冷山空俗駕回彈琴當此際龍象亦應來

丘巨源

夜坐

靜坐書齋夜蕭然一事無松聲磨月戶竹火笑寒爐倦
讀緘昏睫踈吟惜斷鬚浮生緣底事兀兀付團蒲

冬日

粗喜農功畢仍耽夜興長移蔬充歲計藝麥續資糧桑
落新風味松明耿夜光結茅乘屋亟戶外任冰霜

潘鉉

案鉉字仲金聖興
長子瀏陽教授

挽劉竹所

屋角為鄰並書聲隔戶聞三年湖海去一別死生分黃

壤蒙新棘青編冷舊芸故人何處所楚竹慘溪雲

錢寔午

送王敬叔之四明

木落楚江清仙槎指四明固知東道主仍致北涯生浴
日窺暘谷飛霞望赤城登臨有佳句聞鴈莫忘情

孫叔遠

送申推官滿秩北歸

申前任
涇縣尹

向來山縣宰復此秩推官要路開騏驎長才峙鵠鸞豐

年歸夢好涼雨暮江寬
昭代論人物應堪柱後冠

施璠

北行道中

去去中原路青山不厭看
馬羸愁雨滑貂敝怯霜寒
自笑謀生拙寧辭行路難
日邊今咫尺舉首是長安

梅實

案實字仲實堯臣九世孫官集慶路照磨至正末明兵破城不屈死

寄李遵道

與君相別後湖海久無書
聞在龍舒郡新開馬隊居
斯

文欣未墜客況近何如自昔鄒陽學何門不曳裾

李公明

宿水北

此日苦易感那堪秋氣清最憐今夜水只是舊時聲敗
屋若無主新功屬後生悽悽出門去不是有離情

徐恢

與孫丞子肅別

余杜門月臺蓬蒿滿徑車馬之塵了不相及

晉陵孫子肅為丞玉山一日因事上府時時
舍輿曳杖載酒論文必極懽而後去凡余胸
中所蘊未嘗呈露於人者子肅皆深知之由
是相從愈密未幾子肅以君命攝邑事不相
聞者又數月及解官將歸復來告別余知子
肅之才必有用於世者因賦五言四首道其
本末以為餞故於終篇尤不敢以淺淺者望
子肅也

興豈山林盡情因市井疎溪流行復止雲意卷還舒翻
著梵志襪倒騎潘閔驢君來明許事笑指一牀書

官負崔斯立才優滕大夫此聲方得楚適意已思吳賀
厦聊今日躋榮必要塗君心如北闕我興亦西湖

過眼非無客敲門獨有君不惟頻載酒仍許細論文意
好吾何恨情親世未聞重來方煖席別袂忍令分

朝路紛羣策君才自一家九重方旰食萬里尚飛沙樹
脫涼風葉蓼疎清露花何因得美酒留語至昏鴉

附五言律詩

按永樂大典內凡係失名失題無考者附後

送孫仲安湖州學錄

東書當歲暮祖道集時珍
燕尾舟行夜臯比座擁春露
茶烹紫笋雪縷鱸文鱗
此外堪持寄詩傳罨畫真

冬日寄呂周翰

徑葉朝慵掃山扉午未開
拂琴繙舊譜洗杓試新醅
晉帖人臨去吳鞋僧寄來
水村松館外時節又尋梅

東郊因成野酌得家字

行尋東郭勝二妙欲攜家倦息依茅屋流芳覓杏花時
羞鳬去翠春酌酒傾霞何日成三徑求羊跡未賒

紈扇

團圓手中扇誰為剪冰紈明月生懷袖清風濯肺肝當
歌筵畔小驚夢枕邊寒學取秦臺女相携駕綵鸞

次陳仲恕邦傑同遊北園之什

塵埃成俗吏風物屬閒人但見詩無敵爭知筆有神唱
酬俱白雪行樂及青春睽轡歸來晚江郊月色新

送李士元經歷北歸

解組多時住開帆此日歸正逢鴻鴈到喜共鵲鳩飛北
關身還近東山志不違敬亭回首處但憶謝玄暉

南國

疎放消塵思登臨近物情鐘聲過暮靄柳色上春城列
岫連天遠前溪隔樹明雨餘多意緒照眼句能成

幽居

竹院秋逾靜柴門晝不開病先携老去懶漸逐衰來莫

遣新緣結都將舊念灰川魚與雲鳥從此莫驚猜

挽嘉興縣丞孫暘谷

舊轉黃河粟頻哦赤縣松人方歌蔽芾公已主芙蓉雪
暗菟裘地雲深馬鬣封悽其送丹旌執紼涕無從

挽觀察判官魏君

忠孝前朝著風流奕世存懸鐘魏絳宅遺笏鄭公孫雲
散餘仙洞花開自故園傷心延客處稚子獨磨門

宿省

襖被趨省宿披襟對晚涼古心知老樹生意見新篁鐘
鼓鳴將合蜩蟬噪更忙靜中觀物化誰與共平章

挽潘肅齋幹二首

白髮商顏老黃花靖節年角巾人競學麟筆世無傳竹
斷幽棲逕瓜荒手種田百年耆舊盡萬感淚如泉

避地鍾山後看雲疊嶂邊豪華南國盡風度北人傳腹
有藏經笥囊無葬骨錢三株森玉立總解讀遺編

客丹陽喜王起之至

試數髫年友，兵餘子獨存。
逢人長問信，見面却無言。
雲泊丹陽樹，橋連綠水村。
翻嫌烟雨外，為爾役離魂。

送葉弘道赴當塗醫教

西風吹句水，送子宦當塗。
康伯名傳世，醫和業近儒。
囊中漆葉散，肘後玉函書。
自笑無聞者，依然病穎駒。

悼程清叟


今度過符裏，先生已不存。
遺書空滿几，傳業僅餘孫。
秋雨茅茨屋，霜風芋栗園。
寒莎封馬鬣，聊為奠吟魂。

挽損齋劉待制

西蜀雲山遠南陵水竹奇
紫騮梅令邑白酒謫仙詩
視草催秋直藏舟惜夜移
惟餘雙鳳羽五采瑞明時

失題

十日為山客今朝問水程
沙橫疑港斷灘迅覺舟輕
遠近村春合高低漁火明
回頭忽蒼莽一望一傷情



欽定四庫全書

集部

宛陵羣英集卷

七至九

詳校官通政使

臣

夢吉

助教

臣

常循覆勘

膳錄監生

臣

周謨揚

膳錄監生

臣

俞錫玉

膳錄貢生

臣

黃琮

欽定四庫全書

宛陵羣英集卷七

元汪澤民張師愚同編

今體

七言律

宋

李含章

武陵護戎林亭

修篁簇徑出林椒可與遊人避俗囂曲檻隔花安筆硯
小窻延月伴簞瓢紅藤引蔓移山豆綠葉分葩植水蕉

到此每憐清氣別，
可堪寒夜雨瀟瀟。

寄題元長老林亭

聞說幽亭氣象寬，
何須基構入雲端。
平瞻一郡連山翠，
遠矚千門枕水寒。
風拂石床松子墜，
雨籠莎徑栗花乾。
遙知出定牽吟夜，
只欠清猿嘯碧湍。

漁家

數家茅屋枕漁磯，
歲歲生涯在渺瀰。
雞犬怪人奔竹徑，
兒孫逢客倚柴籬。
壁懸蓑笠殘煙雨，
門對溪山閱盛衰。

一曲新歌一舲月夜深來往碧蓮漪

贈內翰王同年

原註王文正公旦與公同年友王為內翰在真宗即位初

徊翔青瑣已多時四海歸榮更是誰
通籍禁中參鳳閣
司言天上煥龍墀
修文禮樂源何大
振筆雲雷澤益滋
若把王褒頌勲業未如際會遇昌期

河北行

為儒還解着征衣
遠戍沙連白草齊
鴈陣不衝羌笛怨
狼烟微認塞雲低
蕎花露濕堆空塹
蓼水泓澄截古堤

漸近界河分內外野禽嘒夏路東西

梅詢

疊嶂樓

謝公城上謝公樓百尺闌干掛斗牛
碧瓦萬家煙樹密蒼崖一檻瀑泉流
波光灩灩前溪滿刹影亭亭古寺幽
此地近除新太守綠窻明月為君留

李宏

案宏字彥恢建炎中呂好問知宣州得士四人詹友端周紫芝王相如及宏每燕集必與

後歷官
轉運使

遊天休觀道流索詩

霓旌羽蓋下飛僊名揭司真列洞天一派銀河懸落水
數峰石壁鎖霏烟潭心雷殷龍應出井口風迴虎未旋

原注山有雷潭風井端欲相從老巖壑凌雲已覺意飄然

陳天麟

壽洋川李守昌諤二首

桂子風高瑞靄浮曉來無處不懽謳共懷襦袴歌蘆范
更指龜蒙祝魯侯風月莫辜三十詠星霜行閱八千秋

皇家正重惟良寄袞服歸公正黑頭

朱輪畫戟擁高牙散作棠陰十萬家
漸向瑤堦對紅藥長傾玉斝壽黃花
僊風自是騎鯨客逸興行飛犯斗槎
誰為淮南門下客願隨鷄犬上雲霞

用齊正韻送叔勤歸湖北

霜點螭坳侍紫皇高文大冊玉鏘鏘
傳家信有青袍物當代爭推古戰場
故國未應窮地脉難兄先已破天荒
相逢若話情親事分我朝回滿袖香

憶舊

西湖當日雨如絲尚記移家去國時
髮短自憐今種種印懸那得更纍纍
身如烏鵲空三匝家似鷓鴣寄一枝
萬事此心俱不計尚容開口細論詩

席上和統制傅公韻

原注公名鈞字子平

遲遲春永晝如年芳草池塘屬惠連
一笑誰云今易得四并須信古難全
山圍錦繡將軍樹雲遏笙歌刺史天
不向風光共流轉恐辜柳絮與榆錢

原注四并乃當日景是日太守陳公

亦出郊往
來山中

除夕偶成呈同舍無簡陳仲恕

東皇送煖下青都雪在梅梢半有無
爆竹舊聞驅罔象傳杯今怕飲屠蘇
暗中石火頻過眼忙裏銀絲欲上鬚
不解玉堂供帖子雙扉聊與換桃符

又次前韻

積陰元自宅幽都昨夜東風一掃無
玉殿仙班搖雜珮銀罌御膳染香酥
柳縈翠帶方眠眼梅褪紅粧已露鬚

拭目太平知有日
兩宮勤儉過祥符

林宗放

贊奉使總領大卿

昔賢兩手并擎天
鼇極功成勢晏然
宗廟鼎彝刊祖烈
相門衣鉢付家傳
藍田種玉連連好
滄海遺珠顆顆圓
六合共知推畫錦
雲來重為拂青氊

賀俞婺州除左史

報政天邊美譽新
十行細札下嚴宸
逢人政爾詢司馬

從俗何由借寇恂制勝萬全端有道折衝一點是精神
向來魯國多男子此日朝家特用真

次宣州太守韻

雙旌迎曉指林廬五馬逢辰政得興西掖舊裁天子詔
名山今睹帝王書胸中霽月何明甚筆底清風更穆如
袞職還須補天手徵黃那復更躊躇

再次韻

肯將苛政削民廬好把寬仁答乘輿襦袴騰誇今日富

春秋欣見有年書門施水薤何須爾庭臥桁楊只晏如
擬頌中和獻天子鯁生無語却躊躇

和龔太守巡江回署之作

防秋纔過又防春帥守憂邊笑亦顰五馬去循江路穩
一帆回帶雨潮新知兵儒將功無敵有道諸侯守在鄰
籌勝名樓瞻手澤阿翁世業肯沉淪

原註龔守先世守
是郡扁樓曰籌勝

吳潛

桐川道中

伊軋籃輿拂面風
桃花倚路笑迎逢
黃鸝轉處風篁密
白鳥飛邊煙樹濃
日午暫休歌客枕
年饑忽喜聽村春
鄉音接續知家近
尚及春犁伴老農

和章子美閱武見貽

事業諸公鬪長雄
非才只願課田功
誰知絃管江南地
漸有弓刀塞北風
大獮未須搜猛獸
先驅聊用習驕驄
還知武備資文事
要在人心可即戎

李孝先

春日有感

雨歛輕寒淑氣回
曉街清霽斷浮埃
風高柳倦終朝舞
歲閏花遲數日開
歸夢每逾千里去
遠書新過萬山來
旅情官况都無賴
強對韶輝滯酒盃

王文資

按寧國府志作文質

贊王五峯察使

維石巖巖有五峯
繡衣直指大江東
觀風要集流民鴈
察吏還從御史驄
天遣梅花迎使節
春融芹藻到儒宮

澄清天下無餘事歸袞當如魏國公

李魚

回次采石

千帆東下勢連檣控帶河山自一方塞角淒風營戍遠
野花濕雨墓田荒落霞孤鷺江干濶去馬來牛歲月長
老我聲名無一遂征衫藍縷鬢蒼蒼

謝當塗陳舍人饋姑孰春

門巷春風翳草萊筆畊無藝甌生埃空成洛下書生詠

敢望青州從事來
洗盞首供堂上壽
留尊更待月中開
陶然竟墮難名境
疑是凌歊百尺臺

晚春

筠牕幽獨靜
亡鄰坐睡從
吾一欠伸
綠樹清圓宜靜晝
孤花寂寞照餘春
時拈栢子燒銅鼎
旋碾茶團淪玉塵
在昔芻蕘猶足採
獨慙無用養閒身

送交代高丞

天涯客裏送人歸
恨絕青青楊柳枝
細雨杏園摩詰畫

春風花岬少陵詩九天掄擢堪先卜萬里功名莫後時
江上豈無西到鴈平安數遣故人知

簡丘倅即次韻

先生志尚直明廬庀職毋嫌外且疎聊向江城紆驥足
行趨禁闥侍鸞輿河陽花樹曾親植魯相葵根欲盡鋤
從此把君詩過目絕勝厚祿故人書

胡渠

挽莫與倫

三顧無人憶草廬
藻江文海竟何如
馬卿早已羞逢掖
狗監誰能薦子虛
曠達嗣宗貧嗜酒
清高元晏老耽書
南州人物今如許
深惜霜林一夜疎

劉有慶

鍾山

蟠龍垂顧飲江湄
臥護宗祧彼一時
馬渡已嗟南國感
猿驚何暇北山移
郊壇曾祝千年運
塔廟空留異代悲
北望中原形勢盡
太平草木亦熙熙

元

王翊龍

和李治中韻

英雄老去覺顏凋
約矢無書可射聊
春暮流光嗟逝水
山深幽夢付回潮
翠林鳥聚雲帷合
清沼魚吞雪絮消
我欲雙溪釣煙雨
彩虹聞已跨飛橋

原注城東
橋新成

再次韻

青松要見歲寒凋
一笑人生樂亦聊
玉樹怕聽吳苑曲

銀山空吼浙江潮年光荏苒鬢毛改世路崎嶇髀肉消
天道乘除春又去杜鵑聲在洛陽橋

熊不易

綿坑雨夜投文祕監

夜經十里綿坑谷虎嘯風號客喪魂行有石頭偏雨滑
去無人跡更天昏鳥啼僅自聽為鬼山盡我還知近村
急報扣門文祕監旋炊香稻為開樽

過符川有感

神宅仙棲倚翠虛何年流水潰焦圩山留阿育當前塔
潭秘旌陽去後符芳草羅生荒市綠高門零落舊時朱
丘墟此地渾閒事禾黍秋風滿故都

水西寺

栢山廟裏神松古裴相園中僧塔高行馬不旋陵變谷
蟄龍一起海生濤樓侵林杪天盈尺雲接溪頭水半篙
隔岸人烟秋色暝一簾疎雨正蕭騷

張浚明

題土山寺二首

出城十里囂塵遠此地登臨是勝遊
山勢西來分鳳爪溪流南下繞龍頭
瞿曇殿聳仍孤刹丞相祠荒但古丘
獨倚闌干人不曾霜風落葉正蕭颼

平瞻蒼翠俯潺湲詩景分明指顧間
地接郊垌換今古秀鍾人物在溪山
春風跨馬銀鞍穩夜月騎牛鐵笛閒
從昔陵陽多俊傑要知天運大循環

原注梅詢侍讀遊此曾乘銀鞍馬李

含章隱此常騎牛吹鐵笛

送表兄從戎

丈夫結髮去從戎，臂健重彎舊角弓。
襄漢兒童知勇力，江淮草木識威風。
平生未展安邊策，一念常懷報國忠。
指日紫袍金帶貴，老天元不負英雄。

朱得先

上郡守

夔龍接武上亨衢，自是君王乞左符。
雨露湛恩霑紫綬，乾坤清氣滿冰壺。
陳留合使飛蝗避，

原注王況為陳留守蝗高飛去

道誰知我馬瘡不有字人心獨苦誰宣皇澤沃焦枯

次馮介溪閒居韻

竹屋松窗香靄間
林猿沙鳥共溪山
種花長占青春好
讀易堪消白日閒
隱處雲泉思共酌
夢中烟樹正相關
他年容我狂吟否
獨立斜陽拄杖斑

王儒珪

上御史

繡衣將指到南溟
驄馬驅馳萬里行
玉鑑冰壺元瑩徹

蠻烟瘴雨喜澄清
簡書程度歸鍾阜
原隰咨詢過謝城
共慶飛龍新御極
好陳民瘼達聰明

王儒珍

送友人之杭求仕

六月塵沙苦鬱蒸
連朝送別意相仍
曳裾慣作侯王客
推轂寧煩玉帛徵
顧我踈慵懷隱豹
憐君矍鑠逐飛鵬
孤山清氣十年在
到日尋詩為一登

王圭

送李廉使之荆南二首

火落金天爽氣浮，澄江練淨引仙舟。
霜威此去清三楚，霖雨行看遍九州。
銀漢星槎當好夜，渚宮烟樹正高秋。
熙朝圖任須元老，未許周南此滯留。

儒林分席春生座，射圃旋車月滿溪。
暫憩棠陰人愛樹，無言李下自成蹊。
恩光新拜宮壺賜，姓字多應御筆題。
但得明良千載遇，腐儒何恨老幽栖。

上李廉訪大使

清於冰玉重於山愛國憂民兩鬢斑霖雨待均環海內
德星暫出斗牛間陽春有脚能生物水鏡無心自照奸
從此棠陰遍南國豈伊寒士獨歡顏

壽阮若山總管

岸幘西風氣自豪從將了事付兒曹也知客裏思鱸膾
何似山中把蟹螯九日黃花如有約百年青眼為誰高
溪山大好登臨地可但餐英賦楚騷

王璋

聞疎齋盧公拜集賢之命以詩寄賀

洛下秋來傳近作日邊使至報除書乍聞北闕多新貴
重直西垣識舊盧陶謝風流連白社應劉文字盛黃初
深知有意沉冥者自是無心賦子虛

寄戴帥初

原註時授
信州教授

重席先生安穩無上饒人物近何如李君會有新篇什
謝氏誰為舊學徒

原注李明通謝
疊山皆廣信人

曲士幾曾關世道斯

文豈不在師儒宣州日日有來使莫寄靈峰水玉珠

和疎齋韻送丁太初叅議

官曹清切遴才賢共喜明時理化絃
燕市驥來媒樂毅
遼東鶴去羨丁仙
胸中載籍經綸地
袖裏封章咫尺天
紫禁烟花春漸好人歸況在鴈歸前

上姚庶使生日

中朝文獻數三姚最說元方有鳳毛
奎璧光芒相照映
神仙地位自清高
南州已賀開新府
西掖端歸占舊巢
從此漢宮陪宴侍不應海上壽蟠桃

次韻卽事

莫爲清醪憶故鄉
喜聞社甕響糟床
鱸魚未出江頭網
螃蟹初登步下舡
醉罷隣牕雞撲碌
夢回空案鼠跳梁
誰言處士無供具
也得山童爨欲涼

貢仲章奉禮歸自都下戲簡

少年如玉更清才
自致青雲不用媒
禮寺暫拋文竹去
慈闈齊慶綵衣來
鵲知人喜移時語
花爲郎歸滿意開
好趁芳辰娛色養
日邊應有使來催

潘李通生日

見君童穉便情親，况復郊居作近隣。
漢相不將金遺子，潘家偏得玉為人。
枯桐撫罷心逾曠，秃筆拈來畫有神。
更趁妙年培遠業，佇看三鳳出風塵。

小閣呈敬仲兄

小閣纔容六尺牀，苦寒聊與蟄俱藏。
少安書卷偏能熟，謾挿瓶花已覺香。
桑火旋分蒸秫竈，松風時和煮茶湯。
閒中有事能談妙，不問維摩借道場。

貢南漪生日

薰風吹送十洲仙，仍占湖山小隱天。
歲月只今書亥字，精神依舊似丁年。
園公志操雖辭漢，季子才名已重燕。
笑遣新詩致樽酒，高門賀客不持錢。

許晞顏

贊監郡公

金章紫綬照南州，身在陵陽最上頭。
曉雨桑麻吳地暖，西風櫓楫楚鄉秋。
朱轡到處行雙鹿，綠野何人佩一牛。

見說御屏題姓字崇班早晚侍前旒

汪鑫

和韻送陳慈湖狀元

澹烟衰草斷吟魂一舸滄浪送客頻
商嶺今聞迎漢老
武陵誰復是秦人
九秋風月詩應好
萬里乾坤道未貧
只恐魁芒天漸遠
明河從此許誰親

趙良巖知縣歲晚見訪

龍種當年舊帝家
飛鳬歲晚尚天涯
忽傳詩句心先識

各問流年鬢欲華
村巷春風喧爆竹
燈簷夜雨飯胡麻
東游故舊如相問
為說桃源學種花

贄徐容齋憲使

桃花深處是吾廬
半世豪華等傳車
夢斷舊蕉曾有鹿
歌殘長鋏信無魚
愁吟獨感庚寅賦
歸去重尋甲子書
聖代喜無封禪事
空山容得病相如

宿瓜州

客愁秋意渺無窮
蘆葦瀟瀟故壘空
山脉南來江欲斷

潮頭東去海相通
斷雲歸鴈淮天碧
落日啼鴉楚樹紅
應是瓜洲笑飄泊
十年三度落征蓬

金陵懷古呈吳山西宮講

虎戰龍爭古石頭
山河歷歷似中州
六朝遺恨千年在
諸老清談萬事休
落日藤蘿梁寺晚
寒烟蔓草晉陵秋
東南歌舞英雄倦
無復新亭泣楚囚

辭洪損軒憲使行姑蘇道中

潮送輕帆過淺沙
重重溝港響衰葭
燕巢未穩元非幕

鱸膾雖肥不是家風急棹歌穿荇葉日斜橋影臥蘋花
垂虹亭下滄浪水不與愁人洗鬢華

汪銖

陶弘景故居

懶著朝衣此隱淪山中宰相至今稱仙魂自入蓬萊島
故宅皆歸蘭若僧種藥地荒人不見煉丹井在月空澄
誰知更有幽栖處茅洞烟霞鎖碧藤

遊金山寺

偶向西津喚渡船
金山勝處訪高禪
人間車馬去無路
水上樓臺別有天
江樹日晴孤鶻下
石潭雲暗老龍眠
鄉僧愛客留煎茗
旋汲巖頭第一泉

楚城九女墩次胡月巖韻

楚城山下草離離
前代興亡不可知
祇見一墩封馬鬣
爭傳同穴葬蛾眉
簫臺鳳已分雙翼
梧野龍猶入九疑
把酒問春春不語
野花野鳥自傷悲

春仲寄鄧處壺

高臺歷歷見闕河
悵悵誰憐別後多
雙鬢盡從愁裏老
一春半向雨中過
溪陰殘雪黏青樹
江上微風起白波
料得湖天花事好
無由分賞欲如何

文敬所自杭歸且聞學飛昇之術和韻奉寄

夢到觚稜日已斜
集英曾得對重華
海邊古說瀛洲路
圯上今無博浪沙
已約詩人吟夜雨
更尋道士服朝霞
馬蹄得意春風路
今度重來不見花

上御史

列位南臺肅紀綱
清水出壑凜寒芒
乘驄秋入青山道
執簡朝凝白紵霜
鷹奮西風初搏擊
鴻安中澤肯飛翔
此邦民瘼如堪畫
異日須將入皂囊